

Inuusuttut inersimasullu innarluutillit atuartinneqarnissaannut, ilinniagaqa-lernissaannut suliffeqarnissaannullu kommunit inatsisit atuuttut naapertorlugit sunik pisussaaffeqarnerannik Naalakkersuisut erseqqissaassuteqaqqullugit Inatsisartut aalajangiiffigisassaattut siunnersuut. (Inatsisartunut ilaasortaag Agathe Fontain, Inuit Ataqatigiit)

Akissuteqaat

(Ilaqutariinnermut Inatsisinillu Atuutitsinnermut Naalakkersuisoq)

Aappassaaneerera

Qujanaq ataatsimiititaliap sulilluarsimaneranut.

Taamaattorli Naalakkersuisut tungaanniit isumaliuutissiissut innersuussutigalugu makkuninnga erseqqissaateqassaagut.

Innuttaasut akornanni innarluutillit (UKA 2012/101) pillugit FN-ip aalajangersagaani oqariartuutigineqartoq isumaliuutissiissummi innersuussutigineqarsimasoq tunngavigalugu naqqiutigissavara, aalajangersagaq tassaammat nunani ilaasortaasuni innarluutillit suli ajunnginnerusumik inuuneqarsinnaanissaat siunertaralugu oqariartuuteqartoq. Tassami aalajangersakkap oqariartuutaanik akuersaarniarneq imatut paasineqassanngimmat, piumasqaatigineqartut tamakkerlugit matumuuna malinneqartussanngorsimassasut. Aalajangersakkamik akuersaarniq akerlianik imatut paasineqartussaavoq, nunap ilaasortaasup sulissutigerusukkaa FN-p aalajangersagaani tikkuarneqarsimasut malinneqarnissaat aqqutissiuunniassallugit.

Naak nunatta innarluutillit pillugit aalajangersagaq malinniarlugu siunniussaqaarsimagaluortoq assersuutigalugu tamanna imatut paasineqassanngilaq, atuarfinni atuartitsiviit tamarluinnarmik imatut aqqinneqarsimassasut atuarfik tamaat isigalugu sumiluunniit meeqqat innarluuteqartut atuartinneqarsinnaallutillu aporfissaqaratik atuartinneqarlutillu nikeriarsinnaasassasut, takuuk sanaartornermut maleruaqqusat.

Maluginiaqquneqassaarmi aalajangersakkap malinniarnissaanut tunngatillugu aalajangiisoqarneratigut taamanikkut Naalakkersuisuusut oqariartuutigisimammassuk nunatsinni innarluutillit atugarisaat sukumiisumik misissuiffiginaritsik, misissuineritillu naapertorlugu qanoq iliuuseriniakkanik saqqummiussiumaarlutik. Taamanikkut Naalakkersuisuusimasut massakkut Naalakkersuisuusunut pisussaaffiliisinnaanngillat. UKA2012/101-p taamanikkut sularineqarneranut tunngatillugu Naalakkersuisuusimasut nalunaarusiaq saqqummiussimavaat, tassami siunertarisimagamikku taanna toqqammavigalugu suliniuteqarniarlutik. Taamaattorli UKA 2012-ip kingorna taamanikkut Naalakkersuisuusimasut annertunerusumik iliuuseqarsimanngillat.

Taamaattumik Naalakkersuisut pilersaarutigivaat innarluutillit atugarisaat pillugit tigussaasunik suliniuteqarniarlutik tamatumani innarluutillit pillugit aalajangersakkat malinniarnissaanut tunngatillugu iliuuseqaateqarniarlutik. Iliuuseqaatiginiakkat arlaqartut aallartisarneqareersimapput, tamatumuunalu aqqutissiuunniarneqarluni innarluutillit atugarisamikkut oqilisaavigineqarnissaat.

Naalakkersuisut pilersaarutigivaat UPA 2015-imi innarluutillit atugarisaat pillugit iliuuseqaatissanik saqqummiussaqaarnissaminnik.

Isumaliutissiisummi eqqaaneqarsimapput innarluutillit ikiorserneqartarnerat pillugit periarfissat suunersut, ilaatigut qarasaasiatigut atortorissaarutinut, nerrivinnut tulluarsakkanut il.il. tunngasut tikkuarneqarsimallutik. Tamatumani isumaqalersitsisoqarpoq tamakku pillugit immikkut innarluutillit atugarisaat pillugit inatsisini eqqaaneqareersimasut, taamaattoqanngilarli. Ikiorsiissutissat suugaluartut, ilanngullugit ikiorsiissutit assigiinngitsut inuup pineqartup pisariaqartitai toqqammavigalugit aalajangersaavigineqartarput.

Tamatuma saniatigut UKA2012/70-imi isumaliutissiisummi tikkuussisoqarsimavoq. Tassungalu tunngatillugu erseqqissaassutigineqassaaq, taamanikkut aalajangersakkatut akuersaarneqarluni suliarineqarsimaneranut tunngatillugu massakut Naalackersuisuusut pineqartoq toqqammavigalugu suleriaaseqarnissaanut pinngitsaaliniarneqarsinnaanngimmata.

Naggataatigut Naalackersuisut tungaanniit mikinngitsumik iluarisimaarparput, ataatsimiititaliap sulinerminut atatillugu innarluutillit atugarisaat pillugit taamak eqqummaaritsigalutik suleriaaseqarsimanerat pillugu.